



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma : f Tir Yimym

Instagram tiryimym@aolima

YouTube tir yimym

TAPAK 8

Australia Ato kilonseri March 8-11 anogotem nung India semdangtsü

Para-shuttler Mandeep Kaur World No.1 asayar kümogo



VOL. XX NO. 142 (ADOK 142) DIMAPUR AMUNGNÜ (SUNDAY) METSÜREMI (MARCH) 05, 2023 ₹ 5.00

PM Modi-i NDPP-BJP sorkar akümdak adentsü

Kohima, March 4, 2023 (TYO): Prime Minister Narendra Modi-i March 7, 2023 nü NDPP/BJP sorkar tezüngzüktep agiba sentong nung adentsü.

Iba sentong ya Capital Cultural Centre Kohima nung agitsü aser Nagaland sorkar tezüngzüktep agiba sentong nung prime minister kati mezüng atema shilem agibaji Modi asütsü.

NDPP-BJP tsüngda election magidang menden lemsar toktep aser parnoki menden 60 nungi 37 nung takok angu.

NDPP-i menden 25 aser BJP-i menden 12 nung takok angu.

Hokolbarnü NDPP legislative party leader asütsü atema Neiphiu Rio shimogo aser pai Honibarnü Governor La Ganesan nem chief minister menden nungi anenba shidi agütsü.

"Kü kümsük temogo anungji ni Governor La Ganesan nem Nagaland indang Chief Minister menden yutsüba shidi agütsüogo" ta tanü Rio-i metetdaksü.

Deobarnü BJP den ajurutepeba sülen Rio-i Hombarnü Nagaland sorkar akümtsü atema Governor nem kuli agütsüak akok ta NDPP osang ajanga angazüker.

Arishi küm 72 tain Rio ya Nagaland nung Chief Minister talangtiba inyaksang lir. Pai March 7 nü kümsük pungububa atongtepa Chief Minister inyaksü atema tezüngzüktep agitsü.

February 27 Assembly election nung Rio-i Northern Angami II nung Congress candidate Seyievelie Sachu madak votes 15, 824 agi takok ngua liasü.

Nagaland nung tetsür MLA ana atema pelar: AWO

Dimapur, March 4, 2023 (TYO): 14 buba Nagaland Legislative Assembly nung tang mezüng atema tetsür MLA ana tashi takok anguba atema kanga pelar ta Angami Women Organization (AWO)-i metetdaksü.

Taküm election nung 8th Western Angami Constituency nungi taoba AWO President

Salhoutuonuo Kruse aser Dimapur III Constituency nungi Hekani Jakhalu Kense nati takok ngua liasü.

Tenaprong ya politics nung mezüngpur lir aser tanga candidate tem den kanga dang meranga toktepa takok ngua, küm 60 sülen Nagaland nung tang mezüng atema tetsür MLA kümogo, ta AWO-isa metetdaksü.

NCP-i Nagaland atema telemteba magi

Kohima, March 4, 2023 (TYO): Nagaland Assembly elections nung Nationalist Congress Party (NCP)-i menden 7 nung takok angu aser parnoki yakta opposition mesüra ruling bench nung adenba osang metetdaksütsü.

Honibarnü Hotel Japfu nung osangbener den jembidang NCP national general secretary & spokesperson, Narendra B. Verma-i ashiba agi "NPP-i candidate 12 toktepdaksüba nungi parnok 7-i takok angu aser tanü NCP Legislature Party indang mezüngbuba senden menogo."

NCP MLA temji- Tening Assembly Constituency nungi Narmri Nchang, Atoizu A/C nungi Er Picto, Mon Town A/C nungi Y Mankhao Konyak, Longleng A/C nungi A. Pongshi Phom, Wokha Town A/C nungi Y Mhanbemo Humtsoe, Suruhuto A/C nungi S. Toiho Yeptho aser Noklak A/C nungi P. Longon nung lir.

"NCP candidate tem shimba atema vote enoktsürtem dang kanga pelar. Parnok teneti Nagaland nung aluyimertem aser kecha masüba nisungtem atema inyaksü" ta Verma-i ashi.

Sharad Pawar-i aniba NCP lennir Verma-i tanü Nagaland NCP MLA tem den onük aika

lemsatepa liasü.

Naga nung yimten tekaratiba nung latettsü aginüba atema NCP-i yariteptsü aser infrastructure development talisa gari lenmang atema inyaksü, ta Verma-isa metetdaksü.

"State Party lennirtem nungi tebilembatem angadonggo aser Nagaland sorkar nung adentsü mesüra madentsübaji Delhi nung Party High Command ajanga lemtettsü. Anogo ana-asep ka tsüngda telemteba agitsü aser ni Deobarnü NCP national President den osang lemsateptsü" ta paisa ashi.

Tesüiba mapang ama NCP MLA temi party toktsür ruling party tem den loktep nunga koda ta osangbeneri asüngdangdang "iba inyakyim ya Nagaland nung dang masü saka state tilatem nung kanga ataloker" ta Verma-i langzü.

Assembly nung opposition tashitait ka alibaji democracy atema kanga tajung lir. NCP-i menden 7 nung takok nguogo anungji Opposition leader angutsü temsüa lir, saka Party high command-i telemteba agitsü, ta paisa ashi.

Nagaland nung NCP MLA 7 külemi dang asütsü aser nübertem asoshi külemi longiemer inyaksü, ta Verma-isa shisem.

Governor Ganesan nem ECI Notification agütsüogo



ECI aser CEO teloki Nagaland Governor La Ganesan nem ECI Notification agütsüba angur.

Dimapur, March 4, 2023 (TYO): Nagaland nung Legislative Assembly tasen tentettsü atema Nagaland Governor LA Ganesan nem ECI Notification agütsüogo.

ECI Notification ya RP Act 1951 indang section 73 nung aliba ama agütsür aser iba nung Assembly Constituency nungi

shimteta MLA tem den parnok party indang tenüngtem agütsür.

Governor Ganesan-i 14 buba NLA General Election takok ngua agiba atema ketdangsurtem nem tenüngsang agütsü.

Vote enoktsür nisung aikati shilem agiba ajanga nübertem demokratisentong nung longsoa shilem agiba angur, ta Governor-

isa ashi.

Election Commission of India telokji Under Secretary, Surinder Singh lenisüba kübok liasü. Iba telok nung ASO Vivek Kumar, ASO Ankur Matla, and the CEO Team was led by Addl. CEO Ruokuovituo Kezhie, Joint CEO Awa Lorin aser Joint Secretary & OSD Hiazu Meru nung dena liasü.

Dhansiripar aser Longleng nung curfew agienogo

Dimapur, March 4, 2023 (TYO): Dhansiripar sub-division aser Longleng jila nung tensa süngjema akümba ajanga curfew ozüng agüja aliba agienogo.

General Election 2023 agiba sülen Longleng jila nung tensa süngjema kümogo anungji

Curfew agiener, ta Longleng District Magistrate Dharam Raj, IAS-i ashi.

Longleng District Magistrate-i March 3, 2023 anüngdang nungi March 6, 2023 anüngdang tashi section 144, CrPC ozüng agüja liasü.

Dhansiripar sub-division

nunga Section 144CrPC kübok tenokdangba agüja liasü saka ibaji agienogo.

February 24 nü Dhansiri sub-division nung tenokdangba agüja aliba agiener, ta Dimapur Commissioner of Police Kevithuto Sophie-i Honibarnü metetdaksü.

Meghalaya nung HSPDP-i NPP yariba meyipa agir

Shillong, March 4, 2023 (Agencies): Hill State People's Democratic Party (HSPDP) president KP Pangniang-i National People's Party (NPP) president Conrad Sangma dangi shidi ka nung NPP yariba meyipa agiba shidi ka zülüogo.

HSPDP MLA ana- Methodius Dkhar aser Shakliar Warjri nati NPP pusema shiditem zülüa liasü.

"Iba nung party shilem kecha mali aser MLA ana nem party-i tashi kecha agüja mali" ta Pangniang-i ashi.

March 3, 2023 nungi HSPDP-i NPP yariba meyipa agir ta paisa Conrad dang ashi.

Meghalaya nung NPP aser BJP madenba sorkar ka akümtsü atema Pangniang-i United Democratic Party (UDP), All India Trinamool Congress (AITC), Congress, People's Democratic Front (PDF) aser

Voice of the People Party (VPP) nung den jembishnüa aru.

Ajisüaka, HSPDP MLA 2-i NPP pusema shidi zülüba ajanga iba mapa nung tetsükdaksü ajuru.

Conrad-i March 3 nü Governor den ajurutepepa MLA 32 dena sorkar akümtsü atema kuli agüja liasü.

Conrad-i March 7, 2023 nü Chief Minister tezüngzüktep agitsüba liasü saka HSPDP-i meyariteptsü ta asüba ajanga iba sentong nung tetsükdaksü ajurutsü akok.

Külen, HSPDP MLA anati NPP yaritsü ashiba meyipa agiang ta Hynniewtrep Youth Council (HYC) aser Hynniewtrep Integrated Territorial Organisation (HITO) ajanga rongshir.

Motphran nung HYC senden ka amendang HSPDP MLA anati NPP medener regional party temi

sorkar akümba nung meyaritepeba aitsü.

Külen, taoba Deputy Chief Minister Prestone Tynsong-ibo March 7 nü NPP-i aniba sorkar akümtsü ta Honibarnü nenshia metetdaksü.

"NPP president Conrad Sangma-i Chief Minister inyaksü atema tezüngzüktep agitsü. Iba sentong nung Prime Minister Narendra Modi aser Union Home Minister Amit Shah na adentsü. Maneni, Assam Chief Minister aser NEDA Convenor Dr Himanta Biswa Sarma-ia sentong nung adentsü" ta Tynsong-i ashi.

"Onok ket nung nübo peria lir aser onoki tanga political party tem den jembidar. MLA 38-40 tashi akümtsü akok" ta paisa ashi.

BJP dak alia HSPDP MLA 2 aser Independent MLA 2-i NPP sorkar pusemer, ta Tynsong-isa shisem.

Yimra agi shirangteper, antibiotics mashii machitsüla: IMA

New Delhi, March 4, 2023 (Agencies): India nung taoba ita ana-asep ka yimra tapu ka agi nisungtem kanga shirangtepa arur. Iba ya Influenza A subtype H3N2 ajanga adokba yimra lir ta Indian Council of Medical Research (ICMR)-i metetdaksü.

H3N2 ya tesüiba ana-asep ka kanga bulua menatepa arur aser nisung aika mozü kidang anioka anepalur ta ICMR scientists-i ashi.

Indian Medical Association

(IMA)-ia yimra agi shirangdang antibiotics kanga machitsü shiogo.

Linük nung nisung aika aketba, temang mokonga shirang aitiba aser saksüba agi timtemer, ta IMA-i ashi.

Shirangbaji anogo asem sülen jungadoker saka aketbabo hopta asem tashi alir ta IMA indang Standing Committee for Anti-Microbial Resistance ajanga metetdaksü.

Mopung menenba ajanga yimra kanga menateper aser

arishi küm 15 nungi 50 tsüngda alir dak kanga menar.

"Tanü-asüng nisungtemi Azithromycin aser Amoxiclav amala antibiotics achir saka kangabo machitsüla" ta IMA-isa metetdaksü.

Nisungtemi Amoxicillin, Norfloxacin, Oprofloxacin, Ofloxacin aser Levofloxacin amala antibiotics tim mesüi achir. Item ya diarrhoea aser UTI anepaludang achiba antibiotics lir, ta IMA-isa ashi.



March 2 nü Kiphire nung DC indang Official chamber nung 59 & 60 AC Observers aser District Administration team tangokba noksa nung angur.

Nagaland State Aids Control Society project director-i ken o jangjashitsü

Dimapur, Metsüremi/March 4 (TYO): Nagaland SACS Project Director, office sangdong ka ajanga osang kaket ka nung Anti-HIV mozü agi anungba ocet ka adoktsüba angazüka bangkaba lemsatepogo.

NACO, State AIDS Control Society aser state ajunga nung NACO-i teyari agütsüba Antiretroviral Therapy Centres 12-i state nung PLHIV tem nem ARV mozü maneni agütsütsü atema kanga meranga inyakdar, ta director-isa ashi.

ART Centre temisa stable clients aser ita shia marutetba client tem nem Multi Month Dispensation (ita 2-3) agüja



arudar. Tashidak mena alirtem maneni temang anepalutsü aser mozü maneni chidaktsütsü atema iba lokti tentet ajanga mozü agüja arudar.

Nagaland SACS ket nung Adult aser Paediatric ARV mozü peria lir aser tang ARV mozü agi manünger. Mozü magütsüma tsüngda mozü bendena ayutsü atema onoki

mozü kwi ali aji kanga junga asadanga arudar.

Osang kaket ka nung ocet ka adoktsüba ya osang tejangja magi-i adoktsüba ka aser iba ajanga nüburttem anisatsü aser nüngdak makaba nung shisabulu tentetdaksüba den nüburttem mangmandaksütsü. Iba amala osang tejangja magi adoktsüba ocet ya Nagaland SACS HIV prevention & treatment program tenüng menüktsütsü asoshi lir aser SACS aser NACO-i meranga inyakba amajok kümdaksüba den facility tem nung staff temi meranga inyakba ajak amajok kümdaksür, ta Project Director Dr.Akuo Sorhie-isa ashi.

Assam Rifles-i sentong balala ayongzüka agi



Dimapur, Metsüremi/March 4 (TYO): HQ IGAR (North) tawabangba kübok Assam Rifles Kohima Battalion-i, March 3 nü Kohima nung asür Rifleman Ram Bahadur Pun nem tetushi agüja naro agütsüba sentong ka ayongzüka agiogo.

Asür Ram Bahadur Pun' Aizawl, Mizoram nung 1966 küm March 3 nü telungpurtemi tepset. Pa ya Battalion nungi yirur aliba sepaitem civil hospital-i belener aoba team nung densema liasü. Yirur alirtem belener aoba mapang pa mena ambulance nung telungpurtemi injang khalokja liasü. Telungpurtem den khatetpa mapang pa khaseta pai pa taküm bendanga agütsü.

Kasa mapang nung Assam Rifles Kohima Battalion-isa, asür L/Naik Bil Bahadur Gurung aser asür Rifleman Sapchhawna Lushai' na nem tetushi agütsüogo. Tena ya 1966 küm March 4 nü Aizawl, Mizoram nung telungpurtemi Battalion Headquarters amakba mapang khaseta liasü.

Tenapronglai kanga tasü ita rara aser pei taküm bendanga agüja liasü.

Naro agütsüba sentong nung asür Sapchhawna Lushai'er kinungertem Lunglei, Mizoram nungi virtually shilem agia liasü. Unit Commandant-i asür Sapchhawna Lushai'er kinungetem den sensak asem aser Battalion tenüng nung

aküm tetushi agüja liasü.

Maneni Assam Rifles Mokochung Battalion-i March 3 nü Mokochung District kübok Watiyim yimtsüng nung Govt Primary School nem IT equipment tem tenla agüja liasü.

IT equipment tem rongnung Computer Sets, printer aser computer, chair aser table tem densem lir.

Item osettem ya Nagaland kübok kinük nung aliba tanurtem computer education tajungba angazükdaksütsü nükjidong nung agütsüogo. Battalion-i tenla tajung agütsüba atema yimtsüng nung alirtem, school ketdangsürttem, tesayurtem aser tsürapurtemi kanga pelaba lemsatepa liasü.

DNSU-i tekümdangtsü metetdaksü

Dimapur, Metsüremi/March 4 (TYO): Dimapur Naga Students Union office sangdong ka ajanga, Dimapur nung kaketshir lokti tentet balalai sentong balala asoshi shishilembar dang nungi tenla meshiba ajanga parnok inyaksangshi nung tetsdaksü adokba osang angazüka süoki ia bilemba lemsatepogo.

Kaketshir lokti ajungkettsü atema lokti tentet balalai parnok indang project balala benoka inyaksüji kanga tongtibang ta inyakba aser tenla meshiba ya shishilembar atema minprong aser iba ajanga shishilembar tenlokyonga

aotsü aliba nung tetsükdaksü adoker ta angatetsü kanga tongtibang, ta kasa sangdong ajanga metetdaksü.

Kaketshirtem ajungkettsü atema kaketshir lokti tentet ka ama asenoki meranga inyaksüla aser office inyaksangshitsü aser renloka aotsü atema teti sen arulen lenmang bushiteta ayutsü nüngdaker aser mapa medeni tenla bendenba dak dang metaloker malitsüla.

Anungji DNSU züngsemtem densema kaketshir lokti tentet ajak dang sen mela mela angutsü atema iba amala tashi amshiba aser Dimapur nung shishilembar minprongba nungi pila alitsü nüngdaker ta DNSU-isa metetdaksü.

Security Forces NSCN-K (YA) OGW ka apu



Dimapur, Metsüremi/March 4 (TYO): Police den longjemer meita aoba mapang Security Forces-i March 1 nü Mon jila kübok Lungwa Jn temeket nung NSCN-K (YA) OGW ka puogo.

Osang tejangja ka angazükba

sülen Security Forces aser State Police na longjemer meita aoba mapang iba nisungba ya pua liasü.

Ken o maneni bushisüngdangtsü atema sepaitemi apuba nisungba ya Mon Town police Station nem bendanga agütsüogo.

AWO-i mezüngbuba tetsür MLA nem tenüngsang agütsü

Dimapur, Metsüremi/March 4 (TYO): Angami Women Organization (AWO)-i sangdong ka ajanga February 27 nü agiba 14buba state General Election nung otsü tasen yanglua tang mezüngbuba tetsür MLA ana shimba atema kanga pelaba lemsatepogo.

Taoba AWO tir Salhoutuonuo Kruse 8th Western Angami Constituency aser Hekani Jakhalu Kense Dimapur III Constituency nungi shima liasü. Tenaprongla ya tang mezüngbuba election nung toktep aser küm 60 tsüngda tang mezüngbuba tetsürttem tenüng nung nokdaksü atema kanga

meranga tokteper aokogo, koba teburtemi dang amokbaner aruogo.

Iba takok tulu asoshi AWO kanga nema adanger aser pelar aser kasa mapang nung Chief Minister aser NNDP party dang tena nem ticket agütsüba atema kanga pelar, koba tena takok asoshi tajangzüka talila ka liasü, ta AWO-isa metetdaksü.

Maneni yimden yimsütsüba nung ajemoka inyakba mapang takok nguyonga aotsü atema imlaja ataba den Tsüngremi shisatsü agüja pa tawabangba nung inyakyonga aotsü sarasademja ataba Angami Women Organization-isa lemsatepa liasü.

NPP-i voter tem dang kanga pelaba lemsatep

Dimapur, Metsüremi/March 4 (Agencies): National People's Party (NPP) Nagaland-i, 14buba Nagaland Legislative Assembly general election nung NPP nem vote agütsürttem ajak dang kanga pelaba lemsatepogo.

State tir Dr. Andrew Ahoti Sema-isa, NPP nem teyari agütsüba kibong, tembar aser party nongita yarirtem dang kanga pelaba lemsatepa liasü.

Maneni pai party kübok telen balala nung inyakertem ajaki election mapang bendanga agüja meranga inyakba atema

kanga pelaba lemsatepogo. Tir-isa, NPP MLA ponguprongla nem tenüngsang agütsüba den parnok dang pei constituency tenüng nungi nokdaker kaka ama pei mapa nendaka inyaksü ayongzüka liasü.

State tir-i ashiba agi, Nagaland NPP party-i lisopurtem ajak terenlok aser yimjiyimjung atema maneni nokdaksü aser bendanga agüja inyaksü aser Nagaland nung aliba nüburttemi ajangshiba timtem tetsükdaksütem asoshi maneni ola adoktsü.



March 04, 2023 nü New Delhi nung India Tir, Droupadi Murmu, Jal Shakti Minister Gajendra Singh Shekhawat, Ministers of State- Prahlad Singh Patel aser Devusinh Chauhan nungeri "Catch the Rain- 2023" tenzüksüdüng tangokba noksa nung angur.

Himachal Pradesh nung cabinet-i Old Pension Scheme agizükogo

New Delhi, Metsüremi/ March 04 (Agencies): Himachal Pradesh nung assembly election atema nüboyimba mapang nung Congress party-i nangzükba ama taküm April 1 nungi tenzükba Old Pension Scheme (OPS) agütsüsü, ta sangdongogo.

Küm 20 sülen tanaben Old Pension Scheme agütsüsü sangdongba ajanga May 14, 2003 sülen mapa nungi anisüngzükertem densema sorkar mapa inyakertem pelateper.

OPS ajanga state nung sorkar mapa inyaker lakh 1.36 dak tema tajangzük angutsü aser 2023-24 küm nung state senpong nungi sen crore 1,000 tali indoktsü.

Hokolbarnü Chief Minister, Sukhwinder Singh Sukhu leniba

nung state cabinet senden amendang taruba financial year nungi OPS mapa küma inyaksü telemtetba agi.

Chief Minister, Sukhu-i, "Election mapang nung Congress-i nangzükba onük 10 rongnung OPS tanaben agütsüsü nangzükba densema lir. Sorkari nangzükba ama ajak ataloktsüsü, anungji ratamata malitsüla. State rongsenketzung jenjang majung aser sentsüh crore 75,000 lir, ajisüaka onoki iba telemtetba agiogo," ta metetdaksü.

"April 1, 2023 nungi old pension scheme mapa küma inyaksü aser New Pension Scheme nungi sen katiba anentsü atema cabinet-i telemtetba agiogo," ta state revenue minister, Jagat Singh Negi-i metetdaksü.

2003 küm sülen shimba sorkar mapa inyakertema old pension scheme küboki aittsü aser OPS mesüra NPS shimtsüji parnok melung südaksütsü.

Cabinet-isa bangzüng ka renema Centre sorkar dang state sorkari agütsüba sen crore 8,000 meyipa agüjang ta ashitsü lemtetogo.

Negi-isa, "April 1, 2023 nungi NPS kübok sorkar mapa inyakertem itasen nungi sen mekatitsü. Mapa inyaker kari NPS aginüra pai sorkar nem ibaji metetdaksütsüla," ta ashi.

Tang tashi nung Congress-i yimsüsüba state ana- Rajasthan aser Chhattisgarh na nung Old Pension scheme agütsüsü telemtetba agiogo. AAP-i yimsüsüba Punjab state nunga sorkar mapa inyakertem nem OPS agütsüsü lemtetogo.

Pakistan nung Hindu, Sikh aser Khristantem amaker: India

New Delhi, March 03 (Agencies): India-i, Pakistan linüki UN sabang tim mesüi amshia tiyazü nung India nem tai tongloksür, ta metetdaksü.

UN Human Rights Council nung Pakistan-i sangdongba o meyiptsüdüng India-i, "Pakistan ketdangseri maneni UN sabang tim mesüi amshia India anema osang tai agütsür," ta ashi.

UN nung jembidang India-i, "Tesüüba küm 10 tsüngda Pakistan indang Commission of Inquiry on Enforced Disappearances nem ken o 8,463 agüja liasü. Iba ama taochi maliba mapatong ajanga

Baloch nungertem kanga takoksa angur. Mapang shia kaketshirtem, doctor tem, engineer tem, tesayurtem aser lenirtem samar," ta metetdaksü.

"Talisa Khristantem kanga mejungi züngshir. Tsüngrem mezügmeshiba özüngtem amshia Khristantem anema inyaker. Pakistan rejutemi official süa 'sanitation' mapatem Khristantem nem agütsür. Khristan tetsürtem anojungi Islam yimsü dangi meyipdaksür saka sorkar aser judiciary-i ibaji anema meinyaker. Hindu aser Sikh nungertemia item ama

timtem balala ajurur, tekülem kitem amaker aser anojungi tetsürtem Islam yimsü dangi meyipdaksür," ta India-isa metetdaksü.

UN Human Rights Council nung jembidang Pakistan Minister of State for Foreign Affairs, Hina Rabbani Khar-i, "India-i özüng alema Jammu & Kashmir atsünga agiba mapa inyaker aser teti atema demography melenshitsü meranger. Iba ya alima nung meimchir temeden aser international özüng alema inyakba lir," ta aija liasü.



Bikaner (Rajasthan), March 04, 2023: Sorkari LPG jenjang atuba anema Honibarnü Bikaner nung Congress züngsemtemi longkak aitba noksa nung angur. Tawa Gas cylinder shia sen 50 atuba sülen Delhi nung gas cylinder ka nung sen 1,103 kümogo.



PANGJUNG JAMIR
ID NO. BJP/INLD/3031
BHARATIYA JANATA PARTY
21 Tuli Mandal, Mokochung, Nagaland
e-mail: pangjungjamir6@gmail.com

PELABA METETDAKTSÜR

14 buba Nagaland Legislative Assembly General Election, 2023 nung toktepdang kü dak kanga temulungdoka ochi mulung agi yaritepertem den party nung inyakertem, kinunger aser medemertem aser ano sarasadem nung nungita yarirtem ajak dang kanga pelaba metetdaksür. Nenoki timtem arema bendanga agüja tangatetba tulu agi inyakba agidang asenoki takok tulu nguogo. Ni nübortem asoshi kanga khuretsa bilema inyaksü aser talisa asenok constituency aser Nagaland state rangben nungdakba terenlok mapatem tajungba inyaka aotsü merangtsü. Ano shisatsü aser sarasadem agi maneni yariangma.





(Pangjung Jamir)

Australia Ato kilonseri March 8-11 anogotem nung India semdangtsü

New Delhi, Metsüremi/ March 04 (Agencies): March 8 nungi tenzükba Australia Ato kilonser, Anthony Albanese-i anogo pezünü India semdangtsü; iba mapang nungji linük ana tsüngda tesendaktep tajungba akümtsü atema jembitsü.

2017 küm sülenbo tang mezüng Australia Ato kilonser kati India semdangtsü.

Honibarnü Albanese-i, "India den onok tesendaktep tashi itta lir, ajisüaka ano tashi taitba akümtsü akok," ta metetdaksü.

Australia PM office sangdong ka ajanga, Albanese aser India Ato kilonser, Narendra Modi nati Ahmedabad yimti nung Border-Gavaskar Trophy fourth cricket Test match külemi repringtsü, ta metetdaksü.

Australia leniri India nung Ahmedabad, Mumbai aser New Delhi yimitem semdangba ajanga linük ana tsüngda asalentong, rongsenketzung aser nüburtem tsüngda tesendaktep ano tajungba akümtsü, ta kasa sangdong ajanga metetdaksü.

New Delhi nung Albanese aser Modi na Australia-India Annual Leaders' summit nung adentsü.

Albanese-i, "India-Australia partnership tajungba akümba ajanga asen region tashi aitba nung yaritsü. Iba tetezü maongka ano teimba angutsü, shishilembaba aser investment shishilembaba aser investment, renewable energy, technology aser defence & security nung



Anthony Albanese

amalitepa inyaksü atema jembitsü.

"Asenoki tarutsü nung rangloker inyakdang India ya maneni tongtibang partner ka asütsü aser Australia tembar tajung ka asütsü," ta Albanese-i ashi.

"Taküm küm tomlen Australia nung Quad Leaders' Summit alidang PM Modi agizüktsü yongyar aser September ita nung G20 Leaders' Summit nung adentsü atema ano India semdangtsü," ta paisa metetdaksü.

India Ministry of External Affairs (MEA)-ia, Albanese den Minister for Trade & Tourism, Don Farrell aser Minister for Resources & Northern Australia, Madeleine King na arutsü, ta metetdaksü.

March 8 nü Albanese Ahmedabad yimti tonga arutsü, March 9 nü Mumbai semdangtsü aser March 10 nü Rashtrapati Bhawan nung pa agizüktsü, ta MEA-i metetdaksü.

Taküm küm tatembanglen Australia nung Malabar naval exercise agitsü aser iba nungji India, Australia, Japan aser US nungi navy temi shilem agitsü.



TIR YIMYIM YIMOBILEM (EDITORIAL)

DIMAPUR AMUNGNÜ, METSÜREMI (MARCH) 05, 2023

Asentenshi nungdaker

Asenok shi temang dang masü saka tanüla tsütsüa süadoker aliba jenjang nungi Tsüngremi dang shia arudaktsütetsü. Asenoki Tsüngrem tenüng nung sentong aika yanglua akatsüa akok mesüra Tsüngrem asoshi mapa aika inyaktsüa akok, saka asenok tanüla kümzüktsü asoshibo mapa tajung aika inyakbaji masü saka Tsüngrem den tesendaktep shitak aliba jagiang kümzüktsü. Kodangsa asenoki asenoksasa asen taküm aser kibong Tsüngrem den tesendaktep shitak mali ama bilemdir, idangji Habakkuk ainker ama, Tsüngrem dang ashitsüla. Tsüngrem den asenok tesendaktep junga mali, tanüla tsütsü kecha tejangraba mali akümba mapangji, asenok atema kanga lendong mapang lir. Idangjibo, asenoki sarasadema mesütetsü aser temulung nung tepela mali kümadoktsü. Idangji, asenoki Kibuba, onok dang koda sarasademtsü sayuang ta shia sarasadem tenzüktsüla. Asenok mapang kabo sarasademba manentet sarasademba anogotema liasü. Asenok aikati Tsüngrem ain tashi amshia temenen tanüla aridokba aser aneptsüba mapatem inyak. Mapang kabo asenok tenük agia nisungtem rongnung tanüla temeshii mapa inyakba nguogo. Asenok aika tzü nung dang masü saka tanüla temeshi nung baptiba purtem lir. Ajisüaka, tanübo item tanüla temeshi tashi nung inyakba mapatem ajak to otsüang ka kümer, asenok taküm aser kibong aika tenüng agiang Khristan ashi, libaliro aser inyaksangshi ajak limapur ama kümogo. Asenoki taoba mapangtem jungjunga bilemdangra, mapang kabo aonung sentep nung dena menden agi makutsüsa nisungtem adenshia Tsüngrem külem aser ken tena sarasademba agi sentepa mesenshitet. Iba amaji tanüla temeshi tadenba asenokia meteta asenok den liasü. Tanübo asenok lokti sentep nungi iba tanüla temeshi tadenba tashi to kenyongi mali samaogo. Joko, pei kidang aser mapa inyakdak sarasadem masüabajibo yutsür, tenla kidanga sarasadem mesüner. Telok külemi sarasadem nung tesüsa sarasademer mali tom nung lokti sarasadem anenadokba mapngji tang ya lir. Ibaji tanüla rusepba aser Tsüngrem den mejembinüba tamaitüsü lir. Habakkuk ainker mapang nunga nübortem tiaji tanü asenok ama, Tsüngrem nungi pilar aliba mapang ka liasü. Ibayongji, Habakkuk-i Tsüngrem dang par nübortem dang taochi sayuang ta sarasademba Habakkuk tapu 3 nung angur. Pai par nübortem dangi asentenshi yokang ta Tsüngrem dang kanga mepishi nungji, Tsüngremi pa den jembi aser Tsüngrem tejembibaji angashia pa kanga tsübuas liasü. Iba ama pei nübortem asoshi sarasademba agi Habakkuk tamang ulushi aser temeshi purtembo tamang agidang alitsü ta pai jungjunga angatet. Asenoki inyakba nung tejang matangtsüa akok, tamakok aser tesama tulu ajurutsüsa akok, ajisüaka nibo teti kibuba nung sanga dang pelaseta alitsü ta ashiba nisungji Habakkuk lir. Kasaji Yihusui par nübortem dang nenokbo kechi telok sülen onüdir oang aser kechi tsüngrem külemnüdir külemang, saka ni aser ozü kibongbo Kibubasa tenzüktsü ta ashiba asenoki bilemtetter. Tanü kasa Yihusua aser Habakkuk nungertem mapang nung amato asenoka Tsüngremi asenok tesamatsüba tia nungi kümzükba ajakto amadoker, alima yimten tashi aser rongsenang tsüngrem kümdaktsür alir. Habakkuk 3:14 nung ashiba ama, tanü asenok pelatepba ola ya Tsüngrem tenüng asangba ola masü saka sensakertem akoksakdaktsüsüba olatem lir. Iba ama mapang nung asen lima aser nübortem asoshi Habakkuk-i sarasademba ama, Tsüngrem dang ain adoktsüba mapanga taochi sayuang aser alemli ama, ano khen, onok dangi yakta asentenshi yokang ta lumia sarasademtsüabajiji kija, kibong aser arogo nung kanga nungdaka kümogo. Khristan-bo Khristan saka Tsüngrem den tesendaktep mali, arogobo arogo saka tanüla temeshi tadenba kenyongi mali takong alitsüabajiji tezdangtsüka lir. Tamang nung amangpetba tamaitüsü aji asütsü. Habakkuk-i ashi ama, kechi tensa ajurudir ajuruaka Tsüngrem den tesendaktep meraksai pelatepa alitsüsa amangtetbajiang jangratemtsüka lir. Iba tamang aser mapangji asenoki Tsüngrem dang meshidi.

OLEMSABANG

YAKODA ASÜTSÜ

~ Toshi Ozüküm, Kohima Town

(Yashi adok nungi...)

Yaküm YSS yakbangpurtemi Tir Yimyim nung Clean Election indang zülubato bilentetdi. Yangto karibo Polling Day anogo nung sannüker, laishirtem aser Arogo tenzükertemi polling station shia nung lemsar sarasadema one man one vote merukmeruka agitsü shisema lir. Iba mapangto tongogo. Anungji ibato shidak inyaktsüla. Aji mesüra Pharisetem ama nüburtemi züngshitsü.

Aolimai Yisu Khrista osang tajung arur joko küm 151 bubai ayaoka aiba küm asenok atema taditang tulutibaji taküm Election ya alitsü. Esau chso ka yong pa senmang yoka achiba ama election mapang senpak ishkayong mesuraa yi bottle kayong nu vote yoka achibajagi küm pongu atema na MLA aser Ministerbar alar akümer. Aji meteta yuang.

Ministertem aser MLA tem seen baikati kng nungi angu ta shisatang nung Develoment atema aruba sen nungi Engineertem kangshi transfer yoktsü agi amokmerena eyazü bill yangludaktsür mapa meinyak nung inyak ama bill yangur agir ta putetogo. Ano LADP nung küm shia Rs 1.5 croer aruba mapa meinyaki teyazü list yanglur sen agizüker bendena ayuba election mapang item senjagi vote alitsü meranger ta butetogo. Ajita mesura MLA 60 küm pongu nung crorwrpati akümba ya kong nungi anguba sen agi crorerpati aküm. Ya koda asürsu?

Anungji 2023 March ita nung sorkar tasenba kümer nuburtemi joko saksalema kümer Nagalandi aruba sen ajak ocial audit asütsü aser itashia sw n kwi arur aser koda amshir ibaji print media ajak nung sangdongtsüla.


Amangbapurtema joko sarasadem melentsüla. Ministertemi auyaa achiba, MLA raktepba ya küm pongu nung crorerpati akümstsü merngba ya ajak anendakjang aser parnoki inyakba taji dokang ta sarasadem masütsüla. Oxhi mashi ajangaa amongdenba rongsen nungi terahilem bener temeshi tenlasapangi bener arudang temang ajak anakshia atendendakjang ta tamangirtemi sarasademtsüla. Kakeshirtem scholarship chitsürtem, shiranger yariitsü mozü aruba rakzüka achirtem Hatsühakok, milamittsür yaritsü aruba sen rakzüka chitaurtem, CPO jang Andhra jang posta nung seper sen tasak agi yoka acirtem ajak Teyanglur Tsüngremi ochi obendang yokang ta amangbapurtemi sarasademtsü ayongzüker. GST compensation sen aruba miima yur sorkar tenzükertem nem ita aieka itasen magutsüi lumiseta sudaktsütsü merngba mapa tamajung ya Naga lima nungi agienang ta amangbapurtemi sarasademtsü ayongzer.

Contractor bill nungi percentage kadizükba agi mapang shidak nung mapa mereneemteter. Tatishitsü agi High Court, Highways etc. Ibajagi Nagaland development rajang akümba ya meshimehia samajang ta sarasademtsü ayongzüker. Asen lima yutsür bendanglima Dimapur Indisen nung Aortem adenshia alinung alinung yangji pi kintanga talisa Tsümartem Hindu Muslaaman nung dangaa taaktuka long agi ontebaa injang bomb yoktepba ya Aortem atema makau maauno. BJP party workertemi tangalen Christintem rishikangshiba indang Naga nung christiantemi aitsür. Saka asen lima nung BJP sorkari sen yokba christiaan Ministertem aser MLA temi auyaa achibabo asnoki ola madoker YA KODA ASÜTSÜ TA TIR YIMYIM AZÜNGER AJAK AYONGZÜKER.

Abelena zülusema alinunga metongshia zügang ta mepihir.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Vietnam-i evangelistic sentong agitsü Franklin Graham dang mela



March 3, 2023 nü Vietnam yimtiba, Hanoi nung Deputy Prime Minister, Le Minh Khai den ketdangsertemi sayutsüngir, Franklin Graham agizükdang tangokba noksa nung angur.

March 04, 2023: Tang mezüng Vietnam nung communist sorkari linük nung evangelistic sentong agitsü atema bendanger Khristan sayutsüngir ka dang melaogo.

March 4-5 anogotem nung sayutsüngir, Franklin Graham-i Spring Love Festival sentong nung Vietnam nunger den Khrista osangtajung lemsatepsü.

"Spring Love Festival ya puti otsü ka asütsü, kechiyong tang mezüng (Vietnam) sorkari Khrista osangtajung sayutsüngitsü atema bendanger sayutsüngir ka dang melar," ta Billy Graham Evangelistic Association (BGEA)-i sangdong ka ajanga metetdaksü.

BGEA Tir aser CEO, Franklin Graham ya nungtugu sayutsüngir asür, Billy Graham'er jabaso lir. Iba festival sentong ya Honibarnü Ho Chi Minh City nung aliba Phu Tho Sports Facility nung tenzükogo, aser Amongnü tembangtsü.

Bodhbarnü Franklin Graham Vietnam tonga aruba mapang nung Vietnam Deputy Prime Minister, Le Minh Khai aser Ministry of Foreign Affairs, Ministry of Home Affairs aser Government Committee for Religious Affairs nungi tongi ketdangsertemi pa agizüka liasü.

Graham-i, "Iba atema ni pelar aser yangi Vietnam nung sayutsüngitsü atema kü dang melaba atema Deputy Prime Minister aser sorkar dang pelar. Ni Vietnam nunger den Tsüngrem temeim osang lemsatepsü," ta metetdaksü.

BGEA-i Vietnam nung Arogo 300 den ayongteper Spring Love Festival ya ayongzük.

Anogo ananü sentong nungsa Michael W. Smith, Luu Chi Vy, Isaac Thai, Le Nguyet Anh aser Naomi Nguyen nungeri ken ajanga shilem agitsü.

Tesüiba mapangtem nung Vietnam nung Easter aser Christmas mapang nung ang

sentong tulu ayongzüka agitsü atema Evangelical Arogotem dang mela aruogo. Tang Spring Love Festival ya puti otsü ka asütsü, kechiyong Khristan benjung masüba mapang ka nung tang mezüng bendanger sayutsüngir ka nem item ama sentong tulu agitsü temelaba agitsür.

Arrshi küm 70, Franklin Graham-isa Vietnam nung ketdangsertem den senden aika amendang linük nung yimsü balala amanger aika aliba aser sorkari religious freedom pusemba dak sendakba onüktem nung o lemtepa liasü.

Ministry of Home Affairs aser Government Committee for Religious Affairs nung Deputy Director, Dr. Vu Chien Thang-i Graham dang Coronavirus wara mapang nung Arogotemi teyari balala agitsüba atema pelaba lemsatepa liasü.

Spring Love Festival ayonger lenirtem rongnung Pastor Ho Tan Khoa-i sangdong ka ajanga, "Protestant Arogotemi Ho Chi Minh City nung alirtem kanga meimer; iba yimti nung nütsüng shilem 90 dak temai Tsüngrem memetet," ta metetdaksü.

Pastor-isa, "Tsüngrem temeim lemsatepsü atema Billy Graham Missionary Association den longjemtsü atema maangka anguba atema onok pelar. Iba ama sentong agitsü atema onoki mapang talangka nungi sarasadema liasü aser Spring Love Evangelism Program nung adenertem den Tsüngrem temeim aser Khrista osangtajung lemsatepsü atema Pastor Franklin Graham aruba atema onok kanga pelar," ta metetdaksü.

2023 küm Open Doors US World Watch List nung alima nung Khristantem alitsü linük tamajungtiba 50 rongnung Vietnam ya jenjang 25buba nung lir.

Open Doors report ajanga, "Akhidang nungi aliba Khristantemi (Roman Catholic Arogotem) yimtenren nung shilem magira temeden kar angur. Vietnam nung

Evangelical aser Pentecostal Khristantem teimbaka house churches nung adener. Sorkar den loktii parnok dak tenük yoker aser bendangshidanga züngshir," ta metetdaksü.

Open Doors-i, "Khristan yimsü dangi meyipertem aika H'mong lisopurtem lir, ibayongji ketdangsertemi parnok dak melung malemer. Khenkhenbo parnok meyong ki raksatsür aser yimyak nungi meindoker, ajisiüka Khristan nütsüng kanga arener," ta metetdaksü.

Government Committee for Religious Affairs-i benokba ozüng tasen kar ajanga sorkari register süa aliba tamangba yimsü organizations anema taliba inyaktsüa akok, ta yaküm tekümdangtsü osang ka metetdakja liasü.

Tawa Washington D.C nung 2023 International Religious Freedom Summit aliba mapang nung Christian Post nungi osangbeneri Vietnam nung Catholic putir, Rev. Peter Nguyen Van Khai den jemba liasü. Iba mapang nungi Rev. Peter-i par linük (Vietnam) nung tamangba yimsü temeden tensa lemsatep.

Tang alima nung communist sorkar ishika dang lir aser Vietnam nunga tesüiba küm aika sorkari yimsü dak sendakba ozüngtem benoker aser register süa aliba yimsü dak sendakba organizations aser Arogotem inyaksangshi aziüoker, ta Peter-i metetdaksü.

Rev. Peter Van Khai monastery ka nung azüngba sülen Arogo aika nung pastor inyaker aser bendangleni oa theology zünga liasü saka communist sorkari pa putir akümtsü nokdanga liasü.

Pa küm 14 tashi theology & philosophy miima azüngba sülen ordain asü saka pa ordain asüba ajanga sorkari par kibong anema apuso.

Paisa, tangbo Vietnam nung Communist sorkari putirtem aser pastor tem mapur saka sorkari putirtem aziüktsü merangba ajanga tensa tamajungba kümogo, ta ashi.

ANOGO ABEN TSÜNGREM DEN

Tenzüktsü asoshi ozüng
- 1Sam 16:1-13

Alimai nisung tajung kar bushir. Khristani sensaker, mokokminer, tsüngtsüker, nükpoker, tebur, tetsür, tanür, tain kin ajak nungi bushir. Kechiba? Kechiaser Tsüngremi ajakji aginer aser nungdaker. Tsüngremi aginüba aser nungdakbaji bilemdangang!

Cyrene nunger Simon Yisu nungdak dang liasü. Iba oren ya bilemtetang: Parnoki iba nisung nem kangkiji apudaktsü. Tsüngrem tenzükba mapa nung taküm agütsübaji atangji Tsüngrem asoshi züngshitsü. Asenok asoshi tongtipang mapaji Tsüngremi nungdak dang asen taküm agütsübaji lir. Asenoki atangji pa tenzükba mapa asoshi agütsütsüla.

Edmund Burke-i ashi: "Tenzükba mapa tajung inyaktsü akokba nisung tamajung kata idakji kodanga malir." Emerson i sangdong: "Alimaji nisung tajung balalai soeta alir; parnoki alimaji junga yutsür." Temaba nükjidong asoshi Khristantem temulung temerük aser bendanga agütsüba taküm alitsüla.

Bendanga agütsüba sarasadem: Kü Kibur aser Kü Tsüngrem, ni anagashitsü aser tashi angutsü ta ozüng agütsütsü aser imlatsü Na temeten ajak kar. Anungji tanü kü sasa ne nem agütsütsü yariang. Ni nungnanga aliba nütsüng ka mesüner. Anungji kü dang yariang. Yisu tenüng nung, Amen.

YWAM tenzüksang, Loren Cunningham dak stage 4 cancer putet

March 04, 2023: Youth With a Mission (YWAM) tenzüksang aser YWAM University of the Nations nung International Chancellor, Loren Cunningham dak Stage 4 cancer putetogo, ta March 3 nü pa kinüngtsü, Darlene-i Facebook post ka ajanga metetdaksü.

Ajisüka arrshi küm 87 sayutsüngir, Loren-i pai ministry mapa maneni inyaktsü, ta shiogo.

Darlene-i Facebook post ka ajanga, "Loren atema sarasademtsüba atema nenok ajak dang kanga pelar. Taoba ita tetenzüklen pa tepokpok nung cells ainba agi doctor

temi 'biopsy' agiba ajanga ibaji cancer liasü ta putet, ibayongji temang rangben scan asütsü atema February 22 nü onok Honolulu-i meyipa aru," ta lemsatep.

"Scan asüba results tang nguogo; Loren tepokpok, teret aser tekong nung stage 4 cancer putetogo," ta lai metetdaksü.

"Tesüngmangtsü kaji-cancer cells ji tekolok tashibo meprokshi. Tang tashi Loren temangba yakyaka lir," ta lai metetdaksü.

"Kibong ka ama onoki Loren arrshi atsülangtsü atema chemo mesüra tanga

treatment agitsü lemtetogo; ibaji ajanga pa tashi meiti akümtsüa akok. Pa den Yisu, kibong, tembartem aser mangdang lir. Iba dak tali onoki kechi meshitsü," ta lai ashi.

Tamalen Loren indang assistant, Andy Beach-i, Loren dak iba tashidak putetyonga pai alima nung tetsü oshi ajak nung Lai lemsatepsü nükjidong nung maneni ministry mapa inyaker, ta metetdaksü.

Sayutsüngir Franklin Graham-ia tsüngdong oa Loren ajuruogo aser pai Facebook ajanga Kona, Hawaii nung YWAM campus semdangba lemsatepa liasü.

Arrshi küm 20 asüdangyongi Loren-i alima tesem ajaklen Khrista osangtajung sangdongtsü nükjidong yur inyaka liasü.

1960 küm pai Youth With A Mission (YWAM) tenzükba sülen küm 50 tashi nungbo YWAM ya alima nung Christian mission organizations tulutiba rongnung ka aküm.

Tang linük 191 nung YWAM nung toklang tenzükker 30,000 shi lir aser iba ministry ajanga nisung million 5 dak tema den Khrista osang lemsatepogo.

AO OSHI ANGAZÜKDAK: TANÜ ANGAZÜKTSÜBA OJANG

Palok

(v) teka sotak, ajeplok (grasp)

* Tambusangi jashiseta tanubusang dak palok.

Panger

(n) pur medemer (friends)

* Panger purtemi ozü kanga yarir.



OLONG PAITEP # 6446

Grid for Olong Paitep # 6446 with numbers 1-18 in specific cells.

TIPIEN

- 1. Inyaker ajangtetba - (3)
3. Bangsemo adokdak - (5)
6. Shitak mesüi inyak - (7)
7. Ya mimong nung angur - (3)
9. Reprangzük - (4)
10. Tasola - (5)
11. S _ _ _ _ - (4)
13. Yagi ajak ashiochtsür - (3)
15. Ki aokba oset - (7)
17. Ak shi nung inokba tasen - (5)
18. Ishika - (3)

LANGTSÜNGLEN

- 1. Meshidak - (3)
2. Tanaben soshir - (7)
3. Iba anogo - (4)
4. Meshi - (3)
5. Yagi mi tsükloker - (9)
6. Shi tapu ka - (9)
8. Yagi ayimer saka ozü masü - (3)
9. Ajokba shiruru ka - (7)
12. Inyaklet - (4)
14. _ _ _ hi - (3)
16. Akümüli nungi pilar - (3)

OLONG PAITEP # 6445 TELANGZÜBA

TIPIEN :

- 2. Tesasa, 5. Men, 6. Warok, 7. Kaset, 8. Temin, 11. Sükak, 13. Talak, 14. Sadok, 15. Ele, 16. Amsük.

LANGTSÜNGLEN :

- 1. Suwar, 2. Teroto, 3. Sadan, 4. Jenti, 7. Kinük, 9. Okadak, 10. Atala, 11. Salem, 12. Saket.




Alokba o Warakla na Welfare department nungi aruba "Relief fund" atema form fill up asütsü line nung nokdaker joko ghonda ka, ghonda ana, asem ta süiaka line to tatsüba maküm nung mit adoker Alokba to Chairmanba tepsettsüa ta arrüloktsür apusodang, Waraklai mesüzük nung mangai ao. Mapang tatsüka lir Alokba to meyipa aruya ngur Warakla to tatayoyoa asüngdang.

Warakla : Tambu, kecha meya-mena mesüka südi? Komasür arur?

Alokba : Aeee, idakjiang line talangba lir, pa tepsetner timba amaia.

~ Lilir : WhatsApp

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangia zülur, noksa (photograph - any size) ka den anogo 3 mesüra 4 jelia e-mail : tiryimim@gmail.com nung yokang mesüra Tir Yimyim bureau tem nung agüjang.



- 1. Tenüng :
2. Tasoba anogo:
3. Küm : 4. Class :
5. School :
6. Talidak :
7. Salem osang :

Rs 1000 cr film dang nungi nübortem yariba jangratatempa: Sonu Sood



Bodoland Knowledge Festival nung Bollywood actor Sonu Sood pelashishia agizükba angur.

Kokrajhar, March 4, 2023

(Agencies): Bollywood actor aser philanthropist Sonu Sood-i Rs 1,000-crore film ka nung shilem agiba dang nungibo nübortem asoshi tajung inyakba nung ang jangratatempa ta ashi.

COVID-19 wara mapang Sood-i bendanglen aayanger lakh aika yaria liasü.

Kokrajhar nung Bodoland Knowledge Festival tembangba anogo nung pai o jembidang iba ya ashi.

"Ni oshi balala- Hindi, Tamil, Telugu, Kannada, Marathi,

Chinese aser English nung film 100 shi ka nung shilem agiogo. Filmtem tajung liasü aser ni takok angu saka kodang COVID-19 wara atong ni kecha masüba nübortem den sendakteptsü maongka angu" ta Sood-i ashi.

"Ni memetetba nisungtem liasü, parnok kodanga majurudang aser kodanga majurutsü akok. Ni meteta mesüra memeteti parnok taküm nung tepela bener arutsü aser ni parnok nungi temoatsü angu. Idangji ni takok angubaji jungjunga metet" ta paisa ashi.

Sood-i bendanger aayangertem asoshi tayimtsü aser bus garitem anepalutsü. 2020 nung mezüng Covid wara poktetdang aayangertemi pei pei kidangi moutettsüa aküm aser idangji Sood-i parnok yari. Paisa Kyrgyzstan nungi India-i kaketshirtem anir arutsü atema tayimtsü ka acha-ayangtsü.

"Ni tesüiba küm 18 nungi 20 shi ka film nung shilem agia arur. Na Rs 500-crore mesüra Rs 1,000-crore film nung shilem agitsü akok saka nisung ka taküm nung temelenshi tajung ka inyakba ajanga tepela anguba den medemdangtsü makok" ta Sonu Sood-isa metetdaksü.

"Ni Assam den sendaktepbaji tasen masü. Covid wara poktetba sülen ni Mumbai nung northeast nunger aika dang nungi tweets angu. Ni mezüng tayimtsü anepalubaji Odisha aser iba sülen Assam atema liasü" ta pai ashi.

"Nisung aikati kü den yaser ajuruteptsü ta texts yok. Parnok kari kü den ajuruteptego aser ano kar kü den külemi mapa inyaker aser kar kü medemertem kümogo" ta Sood-isa ashi.

Sonu Sood-isa Bodoland nung lanurtem dang Bodoland renloktsü atema inyaksü ayongzük.

Manipur Assembly nung MLA ajak 'Warriors of Drugs' kümogo

Imphal, March 4, 2023

(Agencies): Manipur Assembly nung MLA 60 prong "Warriors of Drugs" ta ajatsü lemtetogo.

"March 4 nü Assembly-i iba lemtet agiogo aser state sorkari War on Drugs nung kanga dang tongtipang lir" ta Chief Minister N Biren Singh-i ashi.

Assembly nung N Biren Singh-i iba onük benok aser züngsem ajaki mulunga agizük.

Manipur state sorkari War on Drugs campaign inyaka arur aser iba khuret yagi küm aika state timtema arur. Myanmar den international border (IB) ajanga Manipur-i drugs bener arur.

Manipur nung drug dak sendakba tebilemstü aika lir. Mozü shibelenba, lanurtemi mozü achiba, taküm samaba aser drug manufacturing units lapoker" ta Chief Minister-i ashi.

Manipur kübok tenemlen poppy alu ayimba ya tebilemstü khuret tulu ka lir. Manipur ya Golden Triangle lenmang nung lir aser Myanmar den international border junga atsüdanga mali, ta Biren-isa ashi.

Drug khuret ya magienra tarutsü putu majungtsü, loktiliba kanga mejungi akümstü. Sorkari iba khuret anema raratsü atema senotsü aika endoker, ta paisa shisem.

Khasi CM ka shimtsü atema opposition-i menden 32 nguang: Tynsong

Shillong, March 4, 2023

(Agencies): Meghalaya nung shirnoki sorkar akümstü ta terata ka nung alidang National People's Party (NPP) Vice President Prestone Tynsong-i opposition dang mezüng Khasi-Jaintia Hills region nung menden 32 takok nguang ta shiogo.

NPP-BJP teloktep anema noktaktertemi Khasi Chief Minister ka aginür aser iba atema Tynsong-i iba olen ashi.

Opposition-i Khasi-Jaintia Hills region nung tamasa menden 32 nung takok anguba sülen ang sorkar akümstü asüngdang

asere Khasi Chief Minister ka shimang, ta pai metetdaksü.

Nübertemi takok ngudaksüba akhümstübuttsüla aser taruba küm pungu atema Conrad Sangma-i CM inyaksü lemtetba NPP-i akhümstübur, ta Tynsong-isa ashi.

Nisung kar taginüba atema dang Chief Minister ka tashiyim agi shimtsübaji tamakoktsü. Telatetba kar akhümstübuttsüla, ta paisa shisem.

Meghalaya nung BJP aser NPP dak alia tanünga political party ajak teloktep sorkar ka akümstü atema külem senden ka

menogo.

Iba senden nung TMC aser UDP teshimtet nübotem aden aser parnoki Congress den külemi sorkar akümstü akok ta osang angazüker.

Iba teloktep sorkar nung UDP, TMC, Congress, PDF aser HSPDP MLA tem den Independent MLA ka adentsü ta osang ajanga ashi.

Iba teloktep ya MLA 31-i nungiter aser kobi melii sangdongtsü akok. Osang angazükba agi UDP-i Chief Minister menden agitsü aser TMC-i Speaker inyaksü.



Tripura Chief Minister Manik Saha-i GBP hospital nung anepalurtem semdangba angur. Tripura assembly elections 2023 tembangba sülen lendong balala nung nisung 8 yiruogo aser iba dak sendakba nung nisung 22 puogo. State kübok tesem balala nung BJP, CPIM, Congress aser TIPRA Motha züngsemtem yirua lir ta Tripura Home department-i metetdaksü.

Vanuatu nung state of emergency benokogo

Port Vila , Metsüremi/ March 4 (Agencies): Category 4 Cyclone Kevin agi Vanuatu kongshiba sülen state of emergency benokogo. Iba pacific tzüym nung aliba asetkong ya hopta ka tsüingda yipur tesashi ana aser menoknok ana agi kongshio.

Vanuatu ya Cyclone Judy agi kanga mejungi kongshir power maka akümba den asetkong nung alir karbo aniner aliba mapang ano tanabuba yipur agi kongshia liasü. Cyclone Judy yagi linük yimtiba Port Vila Bodhbarnü kongshia liasü.

Cyclone Judy-i kongshiba sülen lenmang merkatetba den power line yanglushiyonga oya aliba mapang ano Hokolbarnü menoknok ana agi kongshi, aser Cyclone Kevin anasa tonga arur asünung nüburttem dang kidang nungi mainshitsü atema tekümdaktsü metetdakja liasü.

"Vanuatu nung yipru mepung lendong balala agi mapanshia kongshir ajisüaka tang mezüngbuba yipur tesashi anati atonga kongshio," ta United Nations Children's Fund UNICEF nungi Eric Durpaire-i Agence France-Presse news agency dang ashi.

Yipru ana yagi Vanuatu nung alir meyirejang aika dak kongshir alitsü ta asatetogo, ta International Federation of Red

Cross and Red Crescent Societies-i Honibarnü sangdong ka ajanga metetdaktsü.

Sorkari Hokolbarnü state of emergency benok aser Ato Kilonser Ishmael Kalsakau-i ashiba agi, yipru ajanga teraksatsüba bener arutsüba ketdangsürtemi asadangdar, ta Radio New Zealand-i metetdaktsü.

UNICEF Pacific-i ashiba agi, yipru tesashi ana yagi tekübokba jenjang nung aliba tanurtem dak kanga mejungi kongshir alitsü ta shisabulua bilemer aser kibongtem nem teyari agütsüsu atema sorkar den inyaktepdar. UN agency yagisa, parnoki Fiji nungi Vanuatu-i jongdak nungdak peritsüsu atema osettsütem bener yokdar, ta ashi.

Cyclone Kevin yagi linük yimtiba Hokolbarnü sua ao aser Honibar anepdang Tafea province leniogo, ta meteorology department-i ashi. Tafea province nung tekümdangtsü metetdaktsüogo, kong nisung 30,00oshi lir, ta National Disaster Management Office-i metetdaktsü. Rongtema tzüyimi anir maotsü atema tekümdangtsü metetdaktsüogo.

Yipur agi kongshir aliba mapang ano 6.5 aser 5.4 magnitude menoknok anati

Hokolbarnü linük kongshi, ajisüaka iba lendong nung nisung asüba osangbo kecha mali. Kinük nung aliba asetkongtem nung tensa koma ali aji tang tashi mejangjai lir.

"(Espiritu) Santo nung alirtemi menoknok anokba metetogo, ajisüaka mopung kanga sashia aoba ajanga kimai tugur tensa masadangteter," ta Vanuatu Red Cross Society secretary general Dickinson Tevi-i AFP dang ashi.

"Parnoki ashiba agi, parnok junga amoa mao kechiyong yipur aitba ajanga saker aliba mapang menoknok anoka liasü," ta Tevi-i ashi.

"Lendong agi kongshir alirtem den tesendaktep mejungi kümogo, kechiyong lenmang timba raksaago aser power line raksar aliba ajanga power makai akümba agi kinük nung alirtem den tongtepratep mesüteti kümogo. Tafea province kübok Tanna asetkong ya tamajungtiba kongshir alitsü ta imlar," ta Tevi-isa shisem.

Kasa mapang nung Australia-i, süki aser water purification equipment amala emergency supply tem bener tensa asadangtsü atema Vanuatu-i nisung 12 yoktsü. Royal Australian Air Force-ia antung nungi teraksatsübatem asadangtsü, ta ashi.

Philippines: Negros Oriental Angh den nisung 5 khaset

Manila, Tsüklai/February 4 (Agencies): Central Philippines nung provincial Angh ka aser tangar nisung pongu mejangjaba nisungtemi khasetogo. Tawa local yimden yimsüsürtem amakba lendong atalokyonga aruba nung iba ya tesüsabuba asütsü.

Police-i ashiba agi, armed services temi asema uniform mesüka semer nisung trok Pamplona jila nung Angh aliba kidangi ai aser injang khaloktsü.

Negros Oriental province Angh Roel Degamo aser tangar nisung pongu khaseta liasü, ta pa kinungtsüi ashi.

"Angh Degamo yamai asütsü langa mali. Pa Honibarnü par constituents tenzuka liasü," ta Janice Degamo-i Facebook nung lemsatepba video ka nung ashi, shiba Pamplona indang

mayor lir.

Police-isa Honibarnü ashiba agi, iba lendong nung densema mozükidang temang anepalua alirtem jenjanga mejangjai lir.

Philippines nung mapang talangka yimden yimsüsürtem makar aruba rongnung arishi küm 56 tain Degamo amakba ya tesüsabuba asütsü aser taoba küm election tembangba sülen tepsetertem rongnung tasembuba lir.

Tir Ferdinand Marcos-i Degamo tepsetba aitsüogo aser pa tepsetertem takaratiba nung pua merenshitsü tenangzükba agütsüogo.

Negros Oriental Angh mapa atema election agiba vote tanaben züngshiba sülen taoba ita Supreme Court-i, Degamo-i election kokogo ta sangdonga liasü.

Lanao del Sur province indang Angh Mamintal Adiong February ita maka injang agi yirutsü aser iba lendong nung pa indang gari anisang aser police asem tepseta liasü.

Kasa ita Aparri jila vice-mayor Rommel Alameda aser tangar nisung pongu tesem kati oya aliba mapang highway nung mendanga atar tepseta liasü.

Maguindanao province nung kin tashi tait ka nungi lenir aser parnok sülen anidaker nisung 20 dak tema 2009 küm election nung parnok den toktepertem amakba atema taküm tepeyong tepuokdak ayutsü atema obendang agüja liasü. Iba lendong nung yimden yimsüsür ka kinungtsü aser kinungertem aser osangbener aser media worker 32 densema nisung 58 tepseta liasü.

PELABA LEMSATEPER



inyaktsü. Nenok ajak dangi arua temoa ta meshitettaka, nenok ajak dang mulung neta pelar aser Tsüngremi nenok takütem moaianama.

SD/-

SHARINGAIN LONGKUMER

MENUNGRA BILEMTETER



ASÜ: 05 March 2022


Temeim Oja, nai onok toktsür or tanü küm ka ajunger, na tetemsü tetsü ka liasü, ne temeim aser taremsük shisatsü aser nai sayutsüngi tajung agütsüba mamar, na iba lima nung meliaka anogoshi na onok mulungjang nung alir.

Tanü onoki na kanga menungra bilema sarasadema amongerni Oja.

Temeim Salem.

-Nai toktsür aor, Chirnurtem, Semchirtem aser Sosemtangsem

MULUNGNEN O



Tasoba 15/10/1983 ~ Tasüba 22/02/2023

Onoki teti meima aliba kinungtsü asür **Nungsangnungla** (Mongsenyimti). La shiranga aliba anogo nungi asuba anogo tashi adianutem, keja, medemertem, kiyonger, lokti balala aser shirnokisa sarasadem, rongsen, shisatsü aser nubu agi yaria arogo nenok ajak dang tsüngdong arua iba tepela meshitetba atema sasaa bilemer saka Tematiba asen Tsüngremi nenok ajak moajangma.

- Temeim kinungbo, Jabaso aser Kinungertem.



March 04, 2023 : Beijing kübok Great Hall nung Chinese People's Political Consultative Congress (CPPCC) lapokba sentong nung China tir Xi Jinping (teyong) aser tanga ketdangsürtem tangokba noksa nung angur.

Para-shuttler Mandeep Kaur World No.1 asayar kümogo



Mandeep Kaur

Metsüremi/March 4, 2023

(Agencies): India tsür Parashuttler Mandeep Kaur, WS SL3 category nung parabadminton asayatem rongnungi world no.1 asayar kümogo.

Kaur tawa tembangba Spanish Level II Parabadminton International tournament nung shilem agiogo. Iba asayamung ya Vitoria Gasteiz Spain nung February 20 nungi 26 tashi asaya aser iba asayamung ya Paris 2024 Paralympics atema

qualifiers ka liasü.

Iba asayamung nung lai tarep temeyoktep asaya nung la indang partner Chirag Baretha den SL3-SU5 category nung bronze medal angu aser SL3 category tetsür kija asaya nung bronze medal ngua liasü.

Arishi küm 28 tain asayar shiba Uttarakhanda nungi lir la ya Welspun Foundation-i nongita yarir aser tang Dronacharya awardee aser Indian Parabadminton team head national coach Gaurav Khanna

tawabangba kübok Lucknow nung training agidar. Gaurav Khanna yagi temaba jenjang nung asayaba asayar Palak Kohli, Abu Hubaida aser Manoj Sarkar nung nema training aütsüdar.

"Anogo aben kanga meranga inyakba sülen kü nükjidong tongtetogo. Ni len aniba aser nongita yariba atema kü coach dang kanga pelar," ta Mandeep-i ashi.

Tetsür kija asaya SL3 category nung top three asayar asem (Mandeep Kaur, Manasi Joshi aser Parul Parmar) ya Welspun Super Sport Women program nung shilem ka lir.

"Lai kanga meranga inyakba ajanga la nükjidong tongteta world no.1 asayar kümogo. Iba ya takok tulu ka aser coach ka ama lai kümtem tsüingda kanga meranga bendanga agüja inyakba ngua ni kanga nema adanger," ta coach Gaurav Khanna-i ashi, shiba Mandeep temaba jenjang tongtetba atema kanga pelar.

La indang career nung temaba jenjang tongtetba sülen Mandeep maneni international asayamung timba nung shilem agitsü sentong lir, kechiyong 2023 küm Paralympic qualifier küm lir aser la nükjidong medal aika ngua la ranking jenjang meraksatsü asoshi asütsü.

4buba Test nung Mohammed Shami asayatsü imlar

New Delhi, Metsüremi/March 4 (Agencies): India nung fast bowler tem rongnungi ajak dang tejentiba Mohammed Shami Australia den Ahmedabad nung asayatsü atema tatembangbuba Test asaya nung asayatsü imlar. Pa tali mebelemdaksütsü atema Indor nung asayaba Test nungbo masayadaksütsü liasü.

India aser Australia na tsüingda pezübuba aser tatembangbuba Test ya March 9 nü nungi tenzüka asayatsü.

Indian team management-i medical staff nungi shisatsü agiba sülen IPL nung teti asayatsü aser ODI World Cup nung asayadaksütsü atema sentong aliba pace bowler tem anisüngzükdaksütsü atema telemtetba agiogo.

Ibayongji Shami shiba mezüingbuba test ana nung asayaogo aser ODI squad nunga densema lir, pa tasembuba asaya nungbo m a s a y a d a k t s ü i anisüngzükdaksütsü. Pa melen tasembuba Test nung Mohammed Siraj sülen tanabuba pacer ama Umesh Yadav asayadakja liasü.

Mezüingbuba asaya asem nung Siraj over 24 dang ondakja liasü, pa March 17 nungi 22 nü tashi asayatsü



Mohammed Shami

aliba ODI asaya asemprongla nung asayatsü imlar aser Narendra Modi Stadium, Motera nung asayatsü aliba tatembangbuba asaya nungbo masayatsü akok.

Shami, shibai team anaprongla nungi pacer tem rongnung tajungtiba asaya-a over 30 shi nung wicket tenet agiogo pa Motera nung asayaba mapang kanga nungdaksü kechiyong iba pitch nung reverse swing ontetertem

atema kanga tajangzük asütsü.

Iba asayamung ya India-i 2-1 agi kokdar ajisüaka WTC final nung asayatsü atema tatembangbuba asaya ya akoktsü nungdaker.

Holkar Stadium, Indore nung track kanga mejungi renemba atema ICC match referee Chris Broad-i tashishiba agütsüogo aser iba ya temulungdang yur Gujarat Cricket Association (GCA)-i taitsuba kecha malitsü atema tatembangbuba asaya atema pitch renemtsü imlar.

"Indian team management-i onok nem tetuyuba agütsüogo aser pitch anepalurtemi season tepeyong inyaka aruba ama normal track ka yangludat," ta state association source kati PTI dang ashi.

"January ita Ranji asaya tatembangbuba nung Railways pur mezüing bat amenba sülen run 500 dak tema yangluogo aser Gujarat-i innings agi asaya mekokaka innings anaprongla nung run 200 dak tema yangluogo. Tanga taoba mapang dang nungi balaka masütsü," ta pai ashi.

COVID-19 wara pokteter aliba mapang Ahmedabad nung Test ana asaya aser day/night match bo anogo ana nung dang tembang liasü.

Moises Caicedo-i Brighton den tenangzüktepba tasen yanglu

Metsüremi/March 4, 2023

(Agencies): Midfielder Moises Caicedo-i Premier League club, Brighton and Hove Albion den tenangzüktepba tasen ka yangluogo.

Ita ana tejakdang pai January transfer window nung club toktsür oner ta ashiba sülen tang tenangzüktepba yanglushiogo.

Arishi küm 21 tain asayar shibai World Cup nung Ecuador nungi asayaba mapang kanga junga asayaogo, pai club nungi 2027 küm tashi asayatsü atema tenangzüktepba tasen ka yangluogo aser iba den ano club nungi küm ka talila asayatsü atema lenmang sadema lapoka yuogo, ta Xinhua news agency sangdong ka ajanga metetdaksü.

Caicedo-i pa Arsenal nung oa dener ta ashiba sülen tang iba osang ya temai adokogo. Osang ajanga ashiba agi pa atema pound million 70 agütsütsü benokdanga liasü. Pai club toktsür aotsü jangraba lemsatepba sülen pa asaya aika nung masayadaksü liasü.

"Brighton atema otsütsütsüa transfer fee bener arutsüba

atema ni nema adanger aser iba ajanga parnok nem sen tali intokshitsü asoshi maongka agütsütsü aser club maneni takok nung aotsü asoshi teyari agütsütsü," ta pai ashi.

"Fan temi ni kanga saklokogo aser parnok kü mulung nung teti alitsü, anungji ni kechiba iba maongka tajung ya aginer aji parnoki angatetsü ta imlar," ta Caicedo-i club toktsür aotsü asüingdanga sülen ashi.

Asayari club toktsür maotsü atema telemtetba agiba atema Brighton manager Roberto de Zerbi-i pa kanga pelaba lemsatepa liasü.

"Club, onok indang fan tem, ni atema aser tongtibangsa Moises atema. Iba ajanga onok nükjidong atongtsü atema inyakba mapang tashi taitba kümdaksütsü," ta coach-i ashi.

Caicedo ya Independiente del Valle nungi 2021 küm Brighton nung aru aden aser iba sülen pa 2022 küm nungi Premier League nung asaya tenzüka liasü. Pai team nung adenba sülen Brighton puri league asaya 29 asayaba nungi 15 bo kokogo.

Neymar yiruba sülen asaya ana nung masayatetsü

Metsüremi/March 4, 2023

(Agencies): Paris St Germain forward Neymar, tetsüing teloktep yiruba sülen taruba asaya ana nung shilem magitetsü, ta coach Christophe Galtier-i Hokolbarnü metetdaksü.

Pa Ligue 1 nung Nantes den asaya aser Champions League last-16 tanabuba leg Bayern Munich den asayatsü aliba nung masayatetsü.

Brazil nung international asayar ya February 19 nü Lille goal 4-3 agi akokba asaya nung yirur ground nungi anir tugu, aser mapang tatsüka lir pa tetsüing teloktep nung ligament yiruba osang jangjaja liasü.

Galtier-i ashiba agi, Neymar melena attacker ka masü saka midfielder ka anioka asayadaksütsü sentong lir. Taoba hopta Olympique de Marseille goal 3-0 agi akokba asaya nunga pai attacker ka melena midfielder ka anioka asayadaksütsü, kong Lionel Messi aser Kylian Mbappe nati anir par team-i league nung asaya anabuba atonga koka liasü.

"Neymar maliba ya takoksa tulu, saka team liromedema kümdaksütsü atema ano midfielder talila ka bendenlok nung ajungtsü," ta Galtier-i Hokolbarnü osangbenertem den sensaksemba mapang ashi.

"Marseille nung asayaba mapang attacker ana (Messi aser Mbappe) aser midfielder asem asayadakja takok tajung



Neymar

nguogo. Neymar maliba mapang midfielder asem aser attacker ana asayatsü.

Ligue 1 tatemsa koker aliba team ya Champions League nung Bodhbarnü Bayern Munich nung asayaba mapang defender Achraf Hakimi-a medeni asayatsü, saka Galtier bo league nung Honibarnü Nantes den asayatsü aliba dak rangloker lir.

"Asayartem suspend sür aliba aser yiruba ajanga onok team tashi meiti lir anungji league nung kokyonga aotsü atema lenmang bushitsüla," ta pai ashi.

"Asayartemi Bodhbarnü Bayern den asayatsü aliba asaya dak dang rangloker malitsü ta imlar. League nung tasembuba asaya atonga akoktsüji kanga tongtibang," ta pai ashi.

BILEMDANGANG

"Timla samara ajak samatsü."